



KERATAN AKHBAR DAN MEDIA ONLINE UNTUK MAKLUMAN :

**Y.B. MENTERI
Y.B. TIMBALAN MENTERI
Y.BHG. KSU
Y.BHG. TKSU (PDN)
Y.BHG. TKSU (PUP)
SETIAUSAHA AKHBAR**

26 OKTOBER 2021 (SELASA)



KEMENTERIAN PERDAGANGAN DALAM NEGERI
DAN HAL EHRAAL PENGGUNA

KERATAN AKHBAR DAN MEDIA ONLINE (KPDNHEP)

26 OKTOBER 2021 (SELASA)

Hidangan lauk ayam naik harga

GEORGE TOWN – Harga menu masakan berlauk ayam di restoran dan premis makanan di negeri ini didakwa mengalami kenaikan antara 50 sen hingga RM1.50 selepas kebenaran rentas negeri pada 11 Oktober lalu.

Rata-rata pengguna yang ditemui semalam mengatakan mereka menyedari telah berlaku kenaikan harga makanan itu berbanding ketika larangan makan di premis sebelum ini.

Seorang pengguna, Mohd. Hilmi Mahmud, 36, berkata, dia terkejut dimaklumkan harga sepinggan nasi ayam di sebuah restoran di Timur Laut, di sini naik sehingga RM6.50 berbanding sebelum kebenaran aktiviti dine-in iaitu RM6 sebungkus.

Katanya, kenaikan harga makanan ayam itu berlaku selepas kerajaan memberi kebenaran rentas negeri dua minggu lalu.

"Terkedu apabila jurujual di premis itu mempamerkan resit pembayaran bagi hidangan tersebut sedangkan saya baru sahaja membelinya pada harga RM6 sebungkus, sebelum beberapa hari pengumuman dibuat.

"Terlalu cepat mereka menaikkan harga makanan berlauk ayam dan kemungkinan besar ini juga disebabkan kenaikan harga ayam segar di pasar yang ketika ini dijual pada harga RM10 sekilogram," katanya di sini semalam.



HARGA makanan berlauk ayam di sekitar George Town naik harga antara 50 sen hingga RM1.50 selepas kebenaran rentas negeri bermula 11 Oktober lalu. – GAMBAR HIASAN

Seorang lagi pelanggan, Siti Athirah Rozali, 38, berkata, dia mengalami nasib sama apabila harga bagi sepinggan nasi putih berlauk ayam goreng, sebiji telur rebus dengan kuah campur dijual pada harga RM8.50.

"Saya terkejut melihat resit yang diberi jurujual di kaunter restoran itu, sedangkan harga sebelum ini dengan menu sama jauh lebih murah iaitu RM6.80 hingga RM7 sahaja," jelasnya.

Sementara itu, Pegawai Penyelidik Persatuan Pengguna Pu-

lau Pinang (CAP), N. V. Subbarow berkata, pihaknya menggesa Kementerian Perdagangan Dalam Negeri dan Hal Ehwal Pengguna (KPDNHEP) memantau kenaikan harga makanan berasaskan ayam di restoran dan premis.

"Peniaga perlu faham situasi rakyat ketika ini yang sebahagian besarnya terkesan akibat Covid-19. Ketika ini, bukan masa untuk peniaga kaut untung daripada pelanggan dengan mengambil kesempatan semasa kebenaran merentas negeri," tegasnya.

Beg 'celup' dalam talian

KPDNHEP serbu, sita 3,110 produk tanpa cap dagang berdaftar di Batu Caves

Oleh Ruwaida Md Zain
am@metro.com.my

Shah Alam

Sebanyak 3,110 beg silang tanpa cap dagangan sah dirampas Kementerian Perdagangan Dalam Negeri dan Hal Ehwal Pengguna (KPDNHEP) Selangor dalam satu serbuan di Batu Caves, Khamis lalu.

Pengarah KPDNHEP Selangor, Muhamad Zikril Azan Abdullah berkata, tindakan diambil susulan aduan dan pengesahan daripada wakil pemilik cap dagang berdaftar.

Katanya, serbuan mendapati premis itu dijadikan stor penyimpanan dan pusat pengurusan jualan barangan secara dalam talian.

"Siasatan awal ke atas barangan mendapati ia menggunakan cap dagang tanpa kebenaran pemilik cap dagang dan pengesahan dibuat wakil cap dagang yang hadir



ANGGOTA KPDNHEP Selangor menjalankan pemeriksaan selepas menyerbu stor simpanan beg silang tanpa cap dagangan sah. - Gambar/THSAN KPDNHEP SELANGOR

bersama KPDNHEP ketika serbuan dilakukan," katanya.

Muhamad Zikril Azan ber-

kata, KPDNHEP turut mengambil tindakan ke atas lelaki berusia 25 tahun yang disyaki menjalankan perni-

gaan secara dalam talian menjual beg terbabit menggunakan platform e-dagang.

"Semua barangan dan beberapa dokumen urus niaga disita bagi tujuan siasatan dengan anggaran nilai rampasan RM31,100," katanya.

Beliau berkata, kes disiasat mengikut Seksyen 102 (1) (c) Akta Cap Dagangan 2019 yang jika sabit kesalahan boleh didenda tidak melebihi RM10,000 bagi setiap barang atau dipenjara tidak melebihi tiga tahun atau kedua-duanya bagi individu manakala bagi syarikat boleh didenda tidak melebihi RM15,000 bagi setiap barang.

"KPDNHEP memberi amaran kepada mana-mana individu atau syarikat supaya lebih bertanggungjawab dalam menjalankan aktiviti perniagaan sama ada secara dalam talian mahupun fizikal.

"Jalankan perniagaan secara beretika dan tidak sama sekali mencuri hak harta intelek pihak lain demi menjaga keuntungan," katanya.

Pemantauan berterusan turunkan harga ayam, telur

KPDNHEP terus komited tangani isu elak pengguna terbeban

Kuala Lumpur: Isu kenaikan harga ayam dan telur dalam tempoh beberapa minggu kebelakangan ini semakin reda, berikutan harga bekalan itu semakin menurun dan dijangka akan terus menunjukkan penurunan.

Pengarah Penguat Kuasa, Kementerian Perdagangan Dalam Negeri dan Hal Ehwal Pengguna (KPDNHEP) Azman Adam, berkata KPDNHEP akan terus komited dalam usaha menangani isu kenaikan harga ayam dan telur, supaya pengguna tidak terbeban.

Katanya, pemantauan harga ayam dan telur oleh Bahagian Penguat Kuasa KPDNHEP menerusi Ops Catut 8.0, menjadi antara usaha kerajaan untuk memastikan peniaga tidak menaikkan harga bekalan itu sesuka hati.

"Sehingga 5 Oktober lalu, sebanyak 268 premis diperiksa di seluruh negara membabitkan sebanyak 38 premis pada peringkat penternakan, pengeluaran dan pengilangan, pemborong (78 premis) dan peruncit (152 premis).

"Dalam tempoh sama, sebanyak 924 surat pemberitahuan dikeluarkan kepada peniaga bagi setiap rantaian pengedaran ayam dan telur sepanjang Ops Catut 8.0. Ini untuk memastikan harga ayam dan telur dapat distabilkan semula.


"Malah, daripada jumlah itu, sebanyak 643 peniaga bertindak menurunkan harga jualan ayam mereka," katanya.

Beliau berkata, pihaknya turut mengeluarkan sebanyak 262 Notis Pengesahan Maklumat Barangan (NPMB) kepada peniaga yang masih tidak membuat semakan harga untuk mendapatkan maklumat kos dan belian barangan lebih terperinci.

Azman berkata, kenaikan harga ayam disebabkan pelbagai faktor termasuk kenaikan harga makanan ayam iaitu dedak, yang bahan utamanya diimport dari luar negara.

"Selain itu, sebelum ini langkah kerajaan membuka lebih banyak sektor ekonomi di mana kebanyakan negeri sudah beralih ke Fasa 2, 3 dan 4 Pelan Pemulihan Negara (PPN) meningkatkan lagi permintaan ayam sedangkan pe-

Kitaran penternakan integrasi ayam daging



Pemeriksaan pada peringkat pengeluaran makanan ternakan ayam turut dilaksana bagi mendapatkan maklumat berhubung belian bahan utama bagi pengeluaran makanan ternakan ayam iaitu jagung dan soya. Ini bagi mengesan sama ada berlaku aktiviti peningkatan pada kos pengeluaran makanan itu dan mengesan aktiviti mencatut.

Azman Adam,
Pengarah Penguat Kuasa KPDNHEP



ngeluaran ayam mengambil masa sekitar 32 hari sebelum boleh dipasarkan," katanya.

Beliau berkata, langkah lain diambil, termasuk mengadakan sesi libat urus dengan pengeluar atau penternak dan peladang ayam serta bersama agensi kerajaan yang berkaitan, terutama Kementerian Pertanian dan Industri Makanan (MAFI).

"Pemeriksaan pada peringkat pengeluaran makanan ternakan

ayam turut dilaksana bagi mendapatkan maklumat berhubung belian bahan utama bagi pengeluaran makanan ternakan ayam iaitu jagung dan soya. Ini bagi mengesan sama ada berlaku aktiviti peningkatan pada kos pengeluaran makanan itu dan mengesan aktiviti mencatut," katanya.

Mengulas mengenai kononnya harga ayam dan telur dikawal pemborong sebagai orang tengah,

Azman berkata, hasil pemantauan pihaknya menafikan harga bekalan itu dikawal oleh rantaian tertentu.

Beliau berkata, Malaysia mengamalkan sistem ekonomi pasaran bebas di mana permintaan dan penawaran menjadi satu daripada faktor yang menyumbang turun dan naik harga barang.

Justeru, beliau turut menyarankan pengguna lebih bijak menguruskan perbelanjaan terutama ke-



Kenaikan harga ayam dan telur disebabkan pelbagai faktor termasuk kenaikan harga dedak yang bahan utamanya diimport dari luar negara. (Foto Hazreen Mohamad/BH)

tika tempoh yang sukar ini.

Pengguna yang mempunyai maklumat berkaitan salah laku oleh peniaga, aduan boleh di sampaikan kepada KPDNHEP melalui beberapa cara iaitu portal e-aduan.kpdnhep, pusat panggilan 1-800-886-900, e-mel e-aduan@kpdnhep.gov.my, Ez ADU KPDNHEP dan pusat Pusat Arahan Penguatkuasaan (ECC) ditalian 03-8882 6088/6245 serta WhatsApp 019-279 4317.



Pemantauan berterusan penguat kuasa KPDNHEP terhadap harga ayam dan telur mampu mengelakkan kenaikan harga.



Bantuan subsidi, pantau harga elak kos naik

Kuala Lumpur: Kos makanan ayam yang meningkat sekali ganda menjadi antara punca kenaikan harga makanan mentah itu di pasaran.

Pembekal ayam, Azizi Gultom, berkata dahulu harga seguni dedak kira-kira RM65, namun sekarang meningkat terlalu drastik iaitu hampir mencecah RM180 seguni.

"Harga ayam ini tidak pernah turun dan sentiasa naik. Apa yang memberi kesan kepada kenaikan harga ayam ialah harga makanan dedak itu sendiri.

"Jika pemakanan ayam itu dikawal oleh kerajaan dan mungkin diberikan subsidi seperti mana baja dalam sektor pertanian, tidak mustahil harga ayam akan sentiasa stabil," katanya yang menjadi pengedar ayam di kawasan Lembah Klang.

Sementara itu, pemborong telur ayam, Alamin Osman, berkata harga telur ayam ketika ini tinggi berikutan harga ladang dikenakan juga tinggi berbanding kebiasaan.

Katanya, alasan yang diberikan ialah kenaikan harga makanan ayam itu mempengaruhi harga telur dan terpaksa dijual pada harga tinggi.

"Jika dulu harga telur gred A hampir RM10 sepapan, tetapi kini ia mencecah hingga RM14. Biasanya harga telur ini akan turun bila sampai satu tahapnya.

"Sebagai pembekal, kesannya ialah stok telur akan lambat habis kerana ramai berjimat cermat atau menurunkan pembelian gred telur.

"Saya berharap harga telur ayam ini juga akan dipantau," katanya yang menjadi pembekal telur ayam di Kota Bharu, Kelantan.

Reaksi

Kami dipersalahkan atas harga ayam yang mahal sedangkan harga dari ladang masih tinggi.

Hafizul Mohamad,
Peniaga ayam segar



Saya tidak ambil kesempatan menaikkan harga ayam, sebaliknya menjual mengikut harga ditetapkan KPDNHEP, selain tidak mahu bebankan pelanggan.

Zarina Abdullah,
Peniaga ayam

Setakat ini harga ayam di pasar raya masih 'tidak cekik darah' dan dijual pada harga ditetapkan, malah kami menjalin kerjasama dengan KPDNHEP.

Chua Hock Soon,
Penolong
Pengurus
Bahagian
Pentadbiran
pasar raya



Belanja berhemat ketika harga turun naik

Johor Bharu: Mengamalkan perbelanjaan berhemat, termasuk mengurangkan pembelian ayam segar ketika harga masih mahal di pasaran antara tindakan dilakukan segelintir pengguna.

Pekerja swasta, Nor Azura Mohd Amin, 34, berkata kebiasaannya beliau membeli ayam segar dua kali seminggu kerana makanan itu adalah juadah kegemaran anaknya.

Bagaimanapun, katanya apabila berlaku peningkatan harga ayam segar antara RM9.50 hingga RM10 sekilogram dan dianggap terlalu tinggi, pembelian terpaksa dibuat lebih berhati-hati.

"Apabila harga ayam tinggi, saya mengurangkan pembelian ayam segar dan beralih kepada, sama ada ikan yang murah atau telur," katanya ketika ditemui BH.

Apabila harga ayam tinggi, saya mengurangkan pembelian ayam segar dan beralih kepada, sama ada ikan yang murah atau telur.

Nor Azura Mohd Amin,
Pekerja swasta

Nor Azura berkata, lazimnya dia membeli ayam segar di pasar basah, berikutan lokasinya yang berhampiran di rumah berbanding di pasar raya besar yang agak jauh.

"Walaupun harga ayam dikatakan lebih murah di pasar raya besar, faktor orang yang terlalu ramai di situ, menyebabkan saya tidak selesa apatah lagi penularan wabak COVID-19 masih berlaku," katanya.

Sementara itu, peniaga makanan, Fadhillah Ahmad, 45, tidak menafikan, turut berasa terbeban jika berlaku kenaikan harga ayam.

Katanya, beliau pernah mengeluh kepada pembekal mengenai harga ayam yang terlalu tinggi, namun pembekal memberi alasan harga yang diterima dari ladang tinggi, menyebabkan mereka tersepit.

"Menu ayam adalah juadah utama di restoran kami dan menjadi kegemaran ramai, namun kami masih belum menaikkan harga makanan berasas ayam bagi mengelakkan pelanggan marah selain tidak mahu pelanggan lari.

"Peniaga seperti saya tidak boleh membeli ayam di pasar raya besar kerana mereka menetapkan jumlah yang boleh dibeli pelanggan berbanding kami yang membeli dalam kuantiti banyak," katanya.

